

Majlis ANUGERAH AKADEMIK NEGARA



NAJIB Tun Razak diiringi Muhyiddin Yassin bergambar bersama Tokoh Akademik Negara, Prof. Emeritus, Tan Sri Dr. Mohd. Rashdan Baba (lapan dari kanan) serta para penerima Anugerah Akademik Negara pada majlis Anugerah Akademik Negara 2013 di Pusat Konvensyen Antarabangsa Putrajaya (PICC), semalam. Turut hadir Menteri Pendidikan II, Datuk Seri Idris Jusoh (tujuh dari kanan); Timbalan Menteri Pendidikan II, P. Kamalanathan (enam dari kanan); Ketua Setiausaha (KSU) Kementerian Pendidikan, Tan Sri Dr. Madinah Mohamad (tujuh dari kiri) dan KSU II kementerian itu, Datuk Seri Ir. Dr. Zaini Ujang (lima dari kanan).

- UTUSAN/ZAKI AMIRUDDIN

PM garis empat perkara untuk lahirkan generasi hebat, berkualiti

Elemen bangunkan pendidikan

Oleh SHARAIMEI SHAIK AHMEDULLAH

penarang@utusan.com.my

PUTRAJAYA 2 Sept. - Datuk Seri Najib Tun Razak hari ini menggariskan empat perkara utama bagi membangunkan bidang pendidikan tinggi negara dalam melahirkan generasi yang hebat dan berkualiti pada masa akan datang.

Menurut Perdana Menteri, empat perkara tersebut adalah mewujudkan pusat penjaan khazanah ilmu, melahirkan generasi terdidik, mengukuhkan ekonomi dan guna tenaga negara serta mempelbagaikan inovasi dalam menjana sumber kekayaan negara.

Kata beliau, ia selari dengan

amanat Hari Kemerdekaan yang diumumkannya baru-baru ini supaya setiap individu terutama ahli akademik memberi sumbangan bermakna kepada negara untuk diwariskan kepada generasi akan datang.

"Pusat-pusat penjaan khazanah ilmu yang tertinggi mesti dikembangkan dan mesti bertapak dalam negara. Keduanya, bagaimana kita hendak membentuk generasi akan datang yang mana paling penting bukan semata-mata mempunyai kelulusan akademik tetapi terdidik demi legasi masa depan dan kepentingan anak cucu.

"Ketiga faktor ekonomi dan guna tenaga negara iaitu untuk

membawa segala isi wawasan negara, transformasi, cita-cita dalam abad ke-21. Persaingan global yang begitu sengit memerlukan kita menjana dan melahirkan guna tenaga yang boleh ditempatkan, mempunyai kemampuan dan memenuhi syarat-syarat dalam menghadapi persaingan global yang semakin sengit," katanya.

Beliau berkata demikian ketika berucap dalam majlis Anugerah Akademik Negara 2013 di Pusat Konvensyen Antarabangsa Putrajaya (PICC) di sini, hari ini. Yang turut hadir, Timbalan Perdana Menteri, Tan Sri Muhyiddin Yassin.

Perdana Menteri berkata, perkara keempat adalah dengan melibatkan kerjasama lebih erat

antara ahli akademik di institusi pengajian tinggi (IPT) dan pihak industri bagi menjana kekayaan negara menerusi kaedah inovasi.

Najib berkata, pihak IPT menerusi geran, diberikan oleh kerajaan boleh membantu pihak industri yang memerlukan bantuan dan rujukan dengan kaedah penyelesaian inovasi sehingga menghasilkan produk baharu dan lebih kompetitif.

"Sewaktu pasca merdeka belanjawan negara hanya dibuat pada andaian harga getah dan bijih timah pada masa hadapan sebab kita tiada sumber dan punca lain, cuba bayangkan kita kekal tahap itu tanpa minyak, tanpa cukai korporat, cukai pendapatan yang

lain dan sebagainya bagaimana keadaan kita hari ini.

"Sebab itu saya tekankan para akademik mempunyai peranan untuk proses inovasi negara, kita hendak galakkan penjaan kekayaan melalui inovasi dan kita perlu pupuk kerjasama antara ahli akademik dan industri sekiranya ada sektor industri kecil dan sederhana meminta bantuan mereka boleh rujuk pada ahli akademik," katanya.

Dalam pada itu, Perdana Menteri sekali lagi melahirkan sokongan penuh pada Pelan Pembangunan Pendidikan 2013-2025 yang telah dilancarkan baru-baru ini dan berkeyakinan bidang pendidikan negara akan lebih maju pada masa akan datang.